

09/07/2001

Bekas Adun Likas antara disenarai SAPP

Lichong Angkui; Shamsul Kamal Amarudin

KOTA KINABALU, Ahad - Bekas Ketua Menteri, Datuk Yong Teck Lee, adalah antara nama beberapa pemimpin disenaraikan Parti Maju Sabah (SAPP) untuk bertanding dalam pilihan raya kecil Dewan Undangan Negeri (DUN) kawasan Likas pada 21 Julai ini.

Setiausaha Agung SAPP, Richard Yong, ketika mengesahkannya hari ini berkata jika Yong tidak layak untuk bertanding semula, partinya mempunyai beberapa nama lain untuk dicalonkan.

"SAPP tidak ketandusan pemimpin untuk dicalonkan di Likas. Kita mempunyai beberapa nama dan Datuk Yong Teck Lee menjadi pilihan nombor satu," katanya ketika dihubungi di sini, hari ini.

Beliau berkata demikian ketika diminta mengulas kenyataan Setiausaha Agung Barisan Nasional (BN), Tan Sri Mohamed Rahmat, semalam, yang mengesahkan calon BN di Likas nanti adalah daripada SAPP.

Menurut Mohamed, pengesahan itu diberikan berdasarkan pengagihan kerusi di kalangan parti komponen BN di Sabah.

Penamaan calon pilihan raya kecil itu ditetapkan Khamis ini dan jika ada pertandingan, pengundian akan diadakan pada 21 Julai.

Dalam pada itu, Yong mengalu-alukan pengumuman Mohamed berhubung pengesahan wakil SAPP bertanding di Likas dan memberi jaminan partinya kini sudah bersiap sedia menghadapi pilihan raya kecil itu.

Katanya, nama calon akan diumumkan secara rasmi dalam sehari dua lagi.

Sementara itu, Pengerusi Badan Perhubungan Umno Sabah, Datuk Osu Sukam, berkata Umno Sabah akan akur apa saja keputusan Pengerusi BN Pusat dan Presiden Umno, Datuk Seri Dr Mahathir Mohamad, berhubung pemilihan calon dan parti mewakili BN di Likas nanti.

"Keputusan sebenar akan dibuat oleh Pengerusi BN Pusat... apabila beliau buat keputusan, kami akur.

"Sama ada akan memihak kepada Umno atau parti komponen BN lain, itu soal kedua, yang penting ialah jentera Umno sudah digerakkan," katanya diminta mengulas kenyataan Mohamed berhubung SAPP bertanding di Likas.

Ditanya kenapa Umno turut berminat meletakkan calon di Likas, Osu berkata parti itu mempunyai ahli yang ramai di kawasan itu manakala lebih 16,000 daripada 26,196 pengundi berdaftar di Likas adalah Bumiputera Islam.

"Itu perkara biasa... jika kami berkata tidak (berminat meletakkan calon di Likas), sudah tentu ahli Umno akan berfikir," katanya.

(END)